

## 002-1 【<sup>2/10</sup>別歎能詮】疏鈔整理 (意明此經詮於法界·故難思議)

疏鈔一/四冊·華嚴疏鈔卷一 p9~~14 · no. 002-1

整理者: 葉苾芬 · 『華嚴懸談』課程講義 · 2023 · 12

【疏】:

剖裂玄微、昭廓心境 · (總明能詮)      窮理盡性、徹果該因 · (別顯深廣)  
汪洋冲融、廣大悉備者 · (結歎深廣)      其唯大方廣佛華嚴經焉 · (結法所屬)

【剖裂玄微、昭廓心境】：此二句「總明能詮」

1【玄微】者：即指前法界多義也·謂幽玄微妙之旨·剖判分裂在乎此經。

謂於無障礙法界剖為心境二門·故云「昭廓心境」。

2云何【剖裂】：

謂一真法界本無內外不屬一多·佛自證窮·知物等有·欲令物悟·  
義分心境·境為所證·心為能證·

故下引裕公云:「心則諸佛證之以為法身·境則諸佛證之以為淨土」·  
則二皆所證·智為能證·所證之境即大方廣·能證之心即佛華嚴也。

3【昭廓心境】者：心境即上所開·昭廓即是此經。

昭者·明也、照也·廓者·空也·張小使大也。

4云何明心境耶：謂此經中昭明顯著·若凡若聖、若因若果、能觀之心、所觀之境·無不畢備故·如出現品說佛境界即佛境也·說如來心即佛心也·  
諸位心境例此可知。

5云何照心境耶：謂此經中教人觀察若心若境·

如云「欲知諸佛心·當觀佛智慧·佛智無依處·如空無所依」·  
此令觀佛心也。

又云「若有欲知佛境界·當淨其意如虛空」·

此教觀佛境也·菩薩凡夫所有心境觀照例知。

6云何空廓心境耶：如云「法性本空寂·無取亦無見·性空即是佛·不可得思量」·  
即空心境也·無取即無境·無見即無心。

又云「若有欲知佛境界·當淨其意如虛空·遠離妄想及諸取·  
令心所向皆無礙」·亦空心境也。

又云「若有欲得如來智·應離一切妄分別·有無通達皆平等·  
疾作人天大導師」·亦空心境義也。

## 7 云何張小使大：

- <sup>1</sup> 謂若張於心，則無心外之境。張境則無境外之心。以隨舉其一攝法無遺即無涯故
- <sup>2</sup> 故下經云「無有智外如為智所入。亦無如外智能證於如」前句張心。後句張境也
- <sup>3</sup> 真心真境本自無涯。即妄同真則張小使大矣。
- <sup>4</sup> 經云「如來深境界。其量等虛空」。佛境大也。  
又云「佛智廣大同虛空」。真心大也。
- <sup>5</sup> 知妄本自真。見佛則清淨。如心佛亦爾。如佛眾生然。心佛與眾生。是三無差別  
皆張妄心即無涯也。因果萬法心境普收。隨一一事皆可張廓。

【窮理盡性·徹果該因】者：此二句別顯深廣。

### 1【窮理盡性】者：

- <sup>1</sup> 理謂理趣道理。廣也。性謂法性心性。深也。若窮其理趣則盡其體性。
- <sup>2</sup> 今此經中意趣體性皆窮究也。此借周易說卦之言。  
彼云「窮理盡性以至於命」。昔者聖人之作易也。將以順性命之理。
- <sup>3</sup> 注云「命者生之極」。窮理則盡其極也。即以極字解性。性者極也。  
若窮其理數。盡其性能。則順於天命。故次云以順性命之理。

### 2【徹果該因】者：兼於深廣。

- <sup>1</sup> 徹究五周之果。該羅六位之因。則廣也。故廣說地位因果莫踰此經。
- <sup>2</sup> 若云因該果海、果徹因源。二互交徹。則顯深也。
- <sup>3</sup> 初發心時便成正覺。因該果也。雖得佛道。不捨因門。果徹因也。
- <sup>4</sup> 上約廣義。徹果屬果。該因屬因。即明能詮之教該徹彼因果也。
- <sup>5</sup> 今約深釋。徹果屬因。以因徹彼果故。該因屬果。以果徹彼因故。  
即因果自相該徹唯屬所詮。而其能詮。具明斯義。
- <sup>6</sup> 然因該果海、果徹因源。是古人之言。<sup>7</sup> 今欲具含深廣之義。云徹果該因耳。

【汪洋冲融·廣大悉備】者：此二句結歎深廣也。

### 1【汪洋冲融】。明深廣之相。

- <sup>1</sup> 汪汪深貌也。洋洋廣貌也。冲亦深也。亦云中也。亦曰冲和。
- <sup>2</sup> 故老子云「道冲而用之或似不盈」。融者。融通。兼深廣也。
- <sup>3</sup> 故肇公云「汪哉洋哉。何莫由之哉」。八師經中梵志闍句云  
「吾聞佛道。厥義弘深。汪洋無涯。無不成就。靡不度生等」。即深廣義也。
- <sup>4</sup> 亦如冲和之氣。生成萬物而不盈滿。融通萬法令無障礙。

2【廣大悉備】者：即出深廣之由，以無不備故。

<sup>1</sup>此言亦出周易繫辭，彼云「易之為書也，廣大悉備，有天道焉，有人道焉，有地道焉，兼三才而兩之，故六，六者非他也，三才之道也」。

<sup>2</sup>今若取意就經，亦可喻三世間「天道智正覺也，人道有情也，地道器世間也」。

<sup>3</sup>此經廣說三世間故，亦可天道，深理也，地道，事相也，人道，諸佛菩薩修行者也。此強配之，本意但取包含而已。

<sup>4</sup>謂此根本法輪之內，

何法而不具，未有一事一理而不極，一因一果而不備。

五周因果，則五十二位之昭彰，九會玄文則難思教海而可觀。

說真妄，則凡聖昭昭而交徹，語法界則事理歷歷而相收。

佛知見一偈開示而無遺，大涅槃一章必盡其體用。

六百卷般若不出三天偈文，一大藏經文並攝於七字之內。

是謂罄諸佛之智海，竭性相之洪源，故云廣大悉備矣。

【其唯大方廣佛華嚴經焉】者：此句結法所屬，上之勝事唯我華嚴。